

Na osnovu člana 13. Zakona o organizaciji i nadležnostima kantonalnih organa uprave i upravnih organizacija („Službeni glasnik Unsko-sanskog kantona“, broj: 9/13), i stava (8) člana 47. Zakona o izvršavanju Budžeta za 2023. godinu („Službeni glasnik Unsko-sanskog kantona“, broj: 6/23 i 11/23), a na osnovu Odluke Vlade Unsko-sanskog kantona broj: 03-02-2190-455/2023 od 6.7.2023. godine, Ministarstvo obrazovanja, nauke, kulture i sporta raspisuje

JAVNI POZIV
za raspodjelu sredstava tekućeg granta – Grant za informisanje za 2023. godinu iz
Budžeta Unsko-sanskog kantona

Član 1.

Sredstva tekućeg granta – Granta za informisanje za 2023. godinu osigurana u Budžetu Unsko-sanskog kantona dodjeljuju se za programe i projekte od interesa za medije.

Član 2.

Pravo učešća na javnom pozivu imaju:

(1) Mediji koji se bave sa djelatnosti javnog informiranja iz člana 4. stav (1) Zakona o javnom informiranju („Službeni glasnik Unsko-sanskog kantona“, broj: 8/98), i to djelatnosti izdavanja štampe i drugih povremenih izdanja, djelatnosti proizvodnje i emitiranja radijskog, televizijskog programa i djelatnosti novinskih agencija.

(2) Sredstva se dodjeljuju lokalnim medijima koji imaju sjedište i obavljaju djelatnost na području Unsko - sanskog kantona. Programski sadržaji medija finansirat će se kroz sve oblike i vrste medijskog izražavanja svrhom obavještavanja o kulturnim, obrazovnim i ostalim potrebama lokalne javnosti.

(3) Pravo prijave na ovaj poziv imaju domaće medijske organizacije ili medijske kompanije koje su registrovane u skladu sa pozitivnim zakonskim propisima BiH i to:

- a) Radio i televizije kojima su na osnovu stava (1), član 9. *Zakona o javnom radio-televizijskom sistemu Bosne i Hercegovine* („Službeni glasnik BiH“, br.78/2005, 35/2009, 32/2010, 51/2015 i 25/2016) dodijeljene frekvencije koje je utvrdila Regulatorna agencija javnim RTV servisima za televizijske i radio-stanice na području Bosne i Hercegovine i mediji koji posluju u sklopu centara za kulturu.

- b) Pod štampanim medijima podrazumijevaju se novine i druga periodična izdanja koja izlaze dnevno, sedmično, mjesečno ili u razmacima od najviše šest mjeseci, a koji organiziranom i kontinuiranom djelatnošću prikupljaju, obrađuju i objavljuju informacije u skladu sa principima novinarstva i publicistike o različitim sferama života i na različitim nivoima.

Član 3.

Sredstva se dodjeljuju za projekte koji se odnose na:

- (1) Sufinansiranje materijalno-tehničkih sredstava i opreme;
- (2) Podizanja na višu razinu programske osnove, kako u programsko-sadržajnom tako i u tehnološkom smislu;
- (3) Unapređenje i povećanje gledanosti i čitanosti lokalnih medija, proizvodnja i objava kvalitetnih programskih sadržaja od interesa za Unsko-sanski kanton – u obliku tv emisija, radio emisija, tekstova, fotografija i video uredaka u smislu informisanja građana o aktivnostima, projektima i programima koje provodi Unsko-sanski kanton.

Član 4.

- (I) Odabir programa i projekata vršit će se u skladu sa usvojenim općim i posebnim kriterijima.

1. Opći kriteriji:

- a) Da je jedan od medija iz člana 2. ovog Javnog poziva;
- b) Da su mediji sa područja Unsko-sanskog kantona;

2. Posebni kriteriji:

- a) Kvalitet programskog sadržaja od interesa za Unsko-sanski kanton (kvalitet, kreativnost, autorski pristup u osmišljavanju predloženog sadržaja);
- b) Kvantitet objavljivanja programskog sadržaja koji se predlaže i pozicija predloženog programskog sadržaja unutar ukupnog programa medija (vrijeme i trajanje emitiranja kod TV programa i radijskog programa i/ili pozicija objava za portale: naslovnica, posebna rubrika i sl.);
- c) Poticanje kulture, kulturne raznolikosti, umjetnosti i njegovanje baštine;
- d) Razvoj nauke, odgoja i obrazovanja, kulture i sporta;

- e) Poticanje poljoprivrednog i ruralnog razvoja, te zaštite okoliša;
- f) Promovisanje ravnopravnosti spolova;
- g) Poticanje kvalitete programa za djecu i mlade s ciljem isticanja njihove dobrobiti;
- h) Promovisanje socijalne uključenosti, posebno populacije starijih osoba, demobilisanih boraca AR BiH, osoba s invaliditetom i osoba s posebnim potrebama i nacionalnih manjina;

(II) Način bodovanja utvrditi će se posebnim aktom koji donosi Komisija. Komisija će bodovati projekte na osnovu posebnih i općih kriterija bodovima od 1 do 10.

Član 5.

Prije donošenja konačne odluke o odabiru, Komisija zadržava pravo zatražiti dodatna pojašnjenja projekta od aplikanta.

Aplikanti koji nisu ispunili formalno-pravne uslove, odnosno čije su prijave u suprotnosti sa članom 2. ovog Javnog poziva i aplikanti čiji projekti, u skladu sa stručnom ocjenom Komisije, nisu odobreni za finansiranje iz sredstava tekućeg granta - Grant za informisanje bit će o tome obaviješteni.

Obavijest o dodijeljenim sredstvima, nepotpunim i neblagovremenim prijavama objavit će se na web stranici Vlade USK-a – www.vladausk.ba.

Protiv obavijesti iz stava 2. ovog člana aplikanti mogu podnijeti prigovor Ministarstvu obrazovanja, nauke, kulture i sporta u roku od 3 dana od dana objave.

O prigovoru odlučuje ministar Ministarstva obrazovanja, nauke, kulture i sporta.

Odluka o prigovoru je konačna.

Član 6.

Podnosioci zahtjeva dužni su dostaviti sljedeću dokumentaciju kako bi dokazali ispunjavanje uslova:

1. Popunjen aplikacijski obrazac (preuzet sa web stranice Ministarstva);
2. Rješenje o registraciji od nadležne ustanove;
3. Uvjerenje o poreznoj registraciji – identifikaciji (ID) broj;
4. Potvrda banke iz koje je vidljiv broj transakcijskog/tekućeg računa i da je račun korisnika aktivan (ne starija od tri mjeseca);
5. Finansijski plan projekta / plan utroška budžetskih sredstava po stavkama.
6. Dozvola za radio/televizijsko emitovanje koje se vrši putem zemaljske radiodifuzije ili drugi dokaz o posjedovanju dozvole za rad radija ili televizije. (dostavljaju samo mediji koji se bave djelatnošću proizvodnje i emitiranja radijskog i/ili televizijskog programa).

Svi dokumenti prilažu se u originalu ili ovjerenom kopiji koja ne smije biti starija od 3 mjeseca računajući od dana objavljivanja javnog poziva.

Projekat (ovjeren i potpisan od strane podnosioca) dostavlja se na posebno propisanom obrascu.

Neće se uzeti u razmatranje projektni prijedlozi aplikanta čiji administrativni troškovi (režije, telefonski troškovi, uredski materijal, bankovni troškovi, usluge knjigovodstvenog servisa, najam ureda i slično) na projektu prelaze 30 % ukupnog budžeta.

Član 7.

Prijava za dodjelu sredstava odnosno finansiranje/sufinansiranje projekata, posebno za svaki predloženi projekat, podnosi se na posebnom obrascu koji se preuzima sa stranice Ministarstva www.vladausk.ba, ovjerenom i potpisanom od strane odgovorne osobe. Svi aplikanti po javnom pozivu mogu dostaviti samo jedan projektni prijedlog. Projekti se dostavljaju u zatvorenoj koverti (A4 format) sa naljepnicom na koverti (umjesto adrese zalijepljen popunjen obrazac aplikanta koji se nalazi na web stranici Ministarstva: www.vladausk.ba.)

Član 8.

Neće se uzeti u razmatranje prijave aplikanta dostavljene po javnom pozivu:

- a) čija prijava je neblagovremena (dostavljene nakon proteka roka određenog javnim pozivom),
- b) koji ne dostave kompletnu dokumentaciju koja se traži javnim pozivom,
- c) koji za svaku stavku nabavki iz Budžeta projekta veću od 2.000,00 KM ne prilože predračun.

Član 9.

Prijave dostavljene nakon isteka roka iz Javnog poziva vraćaju se aplikantu neotvorene, a sve ostale prijave zajedno sa pratećom dokumentacijom ne vraćaju se aplikantu.

Član 10.

Popunjenu, potpisanu i ovjerenu prijavu sa svim potrebnim prilogima naznačenim u Javnom pozivu slati na adresu: Ministarstvo obrazovanja, nauke, kulture i sporta Unsko-sanskog kantona, Alije Đerzeleza broj 6 Bihać, sa obaveznom napomenom: **Prijava na Javni poziv – ne otvaraj.**

Rok za podnošenje prijava je petnaest (15) dana od dana objave Javnog poziva.

Broj: 10-M-7859-1 / 23
Bihać, 24-07-2023 . godina



Ministar
Mr.sci. Edvin Alijanović